

Chúmo Díusase Minás – Tímor M

Guté minás jaa šugúloane baaráulo bilá, ámin jaa qúrumulo íi hurúšam. Jáa ine šugúloe kaa bút hurúšabáyam. To íne áadat íte bilúm ke sukúul čum díininin gunč yár kháyar nícam. Kháyar níininin éle chímo dúíšam. Mačherdáanian eekáa nukáninin nícam, níininin íse sindáa čum khítine búlan žučilá, khíti yakalar. Íte búlar níininin íse mačherdáani úlo nupíšaninin íne káatúm šugúlomuče chímo íte búl čum dúíšam. Bes sénumar sindáa čum khítine búl díime káa iséulo bút gáti umaibím, chímo. Oor áksar íse búnán yáare chímo gáti bút umaibím. Oómanume káa ése bún yáare mačherdáani nupíšaninin íti yakalum híkum chíte étume káa íce gáti numánin mačherdáaniar žúcibim oor íce dúíšam. Dúisin íce kharétiānulo dúčinin yáte dukáanan méibilúm, íte dukáanulo núcunin gás ócam. Gás nótan káafi ikhárar fíis díusin žúar nícam, sukúule fíis.

To híkulto íne sénimi, “ún ke akaa žúu, góoltirčam béláte duišaan.” Sénasar jé ke eekáa kháyar níyam, mačherdáani nukánin. Niméeninin íce káman chímo yáarum dúusuman, jáa ke dúisas hénam. Et čum báad barénase káa íti yakal Nágár bilúm, Húnzue íti yakal, sindáa íti yakal Nágár bilá. Teéle úe jowáayike sór ecám, “le baréyin, le íte bésan díibi,” séime sór ecám. Mi íte sindáa iílaṭar niméenin baréyana ke íte duğárusin, “bée manilá?” Sénasar úe sénuman, “míi phárişan délām. Isé phárişalar sínda dícibi, barénin,” sénase káa, úlo baréiman ke, phárişan isé sínda dícibim, yárne. Oor isé khíti mími yakal ziáada bim, ú yakal kám bim. To íte sór ecám úe ke “ise délibam ise díusin yár níin,” séibam.

Íse pháriş thaláa khíti mi iíl čar díimi. Žúase káa íse pháriş míi élum díusuman, díusase káa íse akhí káman zínda bim, lékin khás étum apím, úe cók délibam, tumáqaṭe. Íse hóle díusin míi chíor khás étuman. Khás nétaninin, úe sénuman ke “ítine nías múmkin biláa,” sénase káa ítine sínda bút mathán bilúm, múmkin apím. Mi sénuman ke “íte phál etas múmkin apí, síndaar ičhúćiçançar.” 27 Úe sénuman, “parwáa apí, daa yáke ma ičhúninin, şíin.” Sénasar íse phárişe kaa chímo nýyan yáte diméeman, chímo gás ótuman, oor es pháriş éle ye nipháltarinin teéle suá mikhárar qháman étuman, oor zíndagiulo péhli dafá jáa ke phárişan síam.

Bút máza díimi, mágam ke es qhám etas teéruman mi yáali apím, lékin káman háa čum masáalań chíüninin iséulo qhalát notan íse pháriş síman. Níşin, íte bút máza žúasan tajírbaan mánimi éle. Ye gúte minás bilum.